

kiusahlahlama hla'alua arukarumuku

kiariari maruka ucani miararuma Hla'alua, ucanita pihlingi rahluacu  
hlialukaala arukarumuku muriparana, kuiangutungutuhlə umahlikua 'ihlicu  
langica makini mamaini, ulavaisa mahliialukala maahlə caihli, iniciki  
pitarucani acalaiaə mamaini ahlaina, kani'i mamaini ahlainana pitataisa  
mavacangə vulaihli, pihlitulakua cumi'i tam arumukaʷisaka cucu'u məmʷa.

aucaucani aari, aratataisacuka 'Uusu, angahli acalaiaə mamaini,  
malavalə arataisa masalangusangicu ahlaina, umahlikua ta'iaara salia, tam  
pitukutukua mavacangə, maniki avavu 、 turarapurua 、 tumatinənə, uka'a  
cacihli mataingaləisana, acahlimii masalangusangu hla tam pacucupungu  
ahlaina, ihlaisa ma miararuma uatuahla tukutukua hlahlahlusa  
ahlukuaə pauahlahlaina.

ahli'aimau amaisa nua inaisa, ucanisanaka mamainisa ahlaina, hla  
mainimanaka caihlisa, maniki tumahlaəka cucu'u, arupauauhli mahlukua  
saliaisa 'Uusu pauahlahlaina, mairaahlu kutararianə matialu, apuailisa  
rahluaa aramurua rasə hla muripakəpakicuka hlahlusa mahlukaku  
kuaisana, minisuacu pitikicu uavalə misukasə, akuisa musalaka  
hlamamaisa 'Uusuna, mərucəka ahla taku'iarə, musala hlahlusana mahluku  
salia 'Uusuna, tumahlisuluisana marikua vahlita arikakua  
hlikikialanguə 'əvəngu, apulukuluku tahluru, hlacahluma

pusungusingusipi cumahlumu.

puailika inaisa salia rumahlaə, kupaitəahlə acalaiaisa mamainisa  
ahlaina, musa mahlukua miararuma, pakisusuahlai cucu'u, mairaahlu  
uka'aka 'Uusu, səsəmacu kunapuailika 'Uusu, tupurucua inaisa, kitəra  
vahlita tumangitangi, upapapalu umahlikua 'ihlicu langica, pitaisa maluliri,  
maci marua tuahlə malia ili'Uusuku ia, apuria usumanicukuisana.

muruləmulumuka cacihli 'arəmə murumita, amihla kana'ana  
tuahlikua 'Uusu maliaili, məlivicuka inaisa maimacu, pasakulaika 'arəmə,  
tapikakuahlikalia'əvəngu, pasakulai kumali, ulavaisa maliailimana hla  
maliapupulucu hluruania 'Uusuna. puailia 'Uusu salia rumahlaə,  
aramuamuricu arahlatəra, takuacahliaka cucutakuliacəna hlamalivutua  
inaisa 'Uusuna uvura'arəməna, akuainitaka pakiaturu hlipimiaisa,  
tumuacua 'Uusuna matia'ərucə 'arəməna micikirika, kuapuasalaka  
cucutakuliacəna hlaka'ana, micucənguhlə hlapapapaci, kilalialia 'arəməna  
maluliri, mahlava 'Uusuna micuhlu, tapilalaluihli cacapuka tapatapəə,  
hlipangəngutəhləisa hlalungu hla tapəə, makacani tuma'anguhla  
kucupaitəahləa cucutakulaicəna hlakana'ana, ulavaisa ia,  
pakiturucua 'Uusuna hlipimia, muriusumanicu 'arəməna maruvuvurunga  
mangusipi.

拉阿魯哇愛情故事

從前有對結婚已久的夫婦，在結婚 10 年後生下女兒’usu。’usu  
從女孩變成美麗的女人，是眾人心儀的對象。爸媽覺得’usu 還小，  
總是回絕作媒，有人心生憤怒，把’usu 騙到家外，使其掉入陷阱埋  
起來。媽媽找不到女兒，向上天大聲祈求，誰能救出’usu，就要  
將’usu 許配給他。

穿山甲救出奄奄一息的’usu，卻讓壞心的人發現，媽媽要’usu  
跟穿山甲趕快逃離，穿山甲口中念咒，帶’usu 穿過五節芒和月桃  
葉，壞人再也找不到他們。最後，’usu 下嫁給穿山甲，生活在山  
中。